

KERATAN AKHBAR

TARIKH : 28 JUN 2023
AKHBAR : BERITA HARIAN
PAUTAN : <https://www.bharian.com.my/bisnes/lain-lain/2023/06/1120075/inisiatif-usahawan-tani-usaha-tangani-kos-sara-hidup-rakyat>

Inisiatif Usahawan Tani usaha tangani kos sara hidup rakyat



Rafizi pada sidang media mengenai IHP bagi Mei 2023 di Putrajaya, hari ini. - Foto BERNAMA

PUTRAJAYA: Kementerian Ekonomi akan mengumumkan projek pertanian dan pemakanan membabitkan 1,000 ekar pertama di seluruh negara di bawah Inisiatif Usahawan Tani (INTAN) yang dikendalikan sebagai satu daripada program Inisiatif Pendapatan Rakyat (IPR), bulan depan.

Menteri Ekonomi, Rafizi Ramli, berkata projek untuk 1,000 ekar pertama itu sudah mengenal pasti rakan strategik dalam kalangan agensi pertanian kerajaan dan agensi-agensi Kerajaan Negeri yang akan mengusahakannya.

Beliau berkata, kira-kira 4,000 peserta di bawah INTAN dijangka menerima plot tanah seluas kira-kira suku atau setengah ekar setiap seorang.

Katanya, Kementerian Ekonomi juga akan membuka permohonan daripada syarikat pertanian swasta menjadi rakan strategik di bawah INTAN untuk mengusahakan industri pertanian dan pemakanan di tanah kerajaan yang dikenal pasti di seluruh negara bagi keluasan tanah yang seterusnya.

"Maklumat lanjut mengenai usaha itu akan diumumkan pada Julai 2023," katanya sidang media Indeks Harga Pengguna (IHP) bagi Mei 2023 di sini, hari ini.

Rafizi berkata, usaha berterusan untuk menggandakan kapasiti industri pertanian dan pemakanan yang membabitkan sektor awam, swasta dan orang ramai dari kalangan B40 dan miskin tegar itu dijangka akan memastikan bekalan makanan yang mampan di masa akan datang.

Beliau berkata, usaha yang dilaksanakan kerajaan itu adalah untuk menangani kos sara hidup rakyat agar tidak membebankan.

Katanya, selain pelaksanaan dasar dan penguatkuasaan bagi penstabilan harga agar tidak naik mendadak, kerajaan juga menumpukan usaha untuk memastikan bekalan makanan digandakan untuk tempoh sederhana dan jangka panjang supaya seiring dengan permintaan pasaran.

"Kami berharap usaha berterusan untuk menggandakan kapasiti industri pertanian dan pemakanan yang membabitkan sektor awam, swasta dan orang ramai dari kalangan B40 dan miskin tegar ini dijangka akan memastikan bekalan yang lebih mampan pada masa akan datang," katanya.